

Rådet for eldre og menneske med nedsett funksjonsevne i Gaular kommune har i sak 014/16 den 29.03.2016 handsama sak om ; «Råd i kommunar og fylkeskommunar for ungdom, eldre og personar med funksjonsnedsetting – høyring».

Rådet for eldre og menneske med nedsett funksjonsevn i Gaular kommune vil gje slik fråsegn/uttale til høyringa:

Rådet for eldre og menneske med nedsett funksjonsevne i Gaular kommune meiner at noverande lovverk har fungert godt der kommunane har teke lova sine intensjonar på alvor. Vi er positive til at ulike kommunale medverknadsordningar vert samla i kommunelova. Dersom endringane som er ute på høyring skal gjennomførast, må ein vere sikra at lov og forskrifter sikrar at lova vil fungere betre enn i dag i eit fleirtal av kommunane.

Vi er nøgde med at kommunane framleis skal ha plikt til å opprette eldreråd og råd for personar med funksjonsnedsetjing. Vi presiserer at vi ikkje aksepterer dårlegare vilkår enn før, og at alle noverande paragrafar i lova minst må vidareførast i ny lov.

Hovudprinsippet er at desse råda skal få høve til å uttale seg om alle saker som gjeld levekåra for eldre, og for personar med funksjonsnedsetjing. Sakene må leggjast fram i tide, råda må vere sikra relevant sekretærhjelp og ressursar elles. Råda må også ha høve til å ta opp saker på eige initiativ. Målet med ny lov og tilhøyrande forskrifter må vere at råda fungerer betre og vert meir handlegkraftige. Det er godt kjent at eldre, over 65 år er sterkt underrepresenterte i alle typar demokratiske organ. Godt fungerande eldreråd kan hjelpe noko på dette misforholdet.

Kravet om at fleirtalet i eldreråd skal vere alderspensjonistar må oppretthaldast, og ikkje erstattast med krav om ei viss aldersgrense.

Framleggsrett for organisasjonane og valreglar både for «serskilde» råd og for samanslegne råd må oppretthaldast som i dag. Dersom der er fleire organisasjonar som kan ha framleggsrett må det vere eit krav at organisasjonen er representativ for gruppa, og at han er tilstades lokalt.

Ved spørsmål om eldreråd og råd for funksjonshemma skal slåast saman, må organisasjonane for begge grupper samtykkje i dette.

Vi meiner at det er rett å ha med eit mindretal med aktive politikarar i eldreråda, helst leiar av vedkomande hovudutval og eit formannskapsmedlem. Dette sikrar kontakten med det politiske miljøet elles i kommunen.

Vi meiner det er uheldig at denne reforma vert gjennomført no, før ein veit resultat av kommunereforma. Dersom kommunereforma fører til vesentlege endringar i kommunestruktur, vil det få konsekvensar på også dette området.

Rådet for eldre og menneske med nedsett funksjonsevne i Gaular kommune vil komme attende med konkrete framlegg om organisering i vårt område når ein ser resultatet av kommunereforma i Indre Sunnfjord.

Fråsegna vert å sende til kommunal- og moderniseringsdepartementet, Pensjonsforbundet i Sogn og Fjordane, Fylkesrådet for eldre i Sogn og Fjordane, Fylkesrådet for menneske med nedsett funksjonsevne, ordførar/varaordførar i Gaular kommune, samt til gruppeleiarane i dei ulike partia som er representerte i Gaular kommunestyre.

Samrøystes godkjend.

